

四庫全書

經部

欽定四庫全書

春秋集解卷二十

宋呂本中撰

襄公

十年春公會晉侯宋公衛侯曹伯莒子邾

公作邾婁下同

子滕

子薛伯杞伯小邾子齊世子光會吳于柤夏五月甲午

遂滅偃

穀作傳

陽

左氏傳春會于柤會吳子壽夢也夏四月戊午會于

祖

杜注經書
春秋始行也

晉荀偃士匄請伐偃陽而封宋向戌

焉荀瑩曰城小而固勝之不武弗勝為笑固請丙

寅圍之弗克荀偃士匄請於荀瑩曰水潦將降懼

不能歸請班師知伯怒授之以机出於其間曰女

成二事而後告余余恐亂命以不女違女既勤君

而興諸侯牽帥老夫以至於此既無武守而又欲

易余罪曰是實班師不然克矣七日不克必爾乎

取之五月庚寅荀偃士匄帥卒攻偃陽親受矢石

甲午滅之以與向戌向戌辭乃予宋公晉以偃陽
子歸獻於武宮謂之夷俘偃陽姁姓也使周内史
選其族嗣納諸霍人

穀梁傳會又會外之也

劉氏權衡曰穀梁曰外之也非也會于戚吳在何不外之乎

會于申淮夷亦在何不外之乎

杜氏注祖楚地偃陽姁姓國今彭城傳陽縣也

呂氏曰中國諸侯往與吳會宜示以禮義明以王制
以同獎周室遂滅偃陽不道甚矣

公至自會

穀梁傳會夷狄不致惡事不致此其致何也存中國也中國有善事則并焉無善事則異之存之也故鄭伯逃歸陳侯致祖之會存中國也

楚公子貞鄭公孫輒帥師伐宋

左氏傳六月楚子囊鄭子耳伐宋師於訾母庚午圍宋門於桐門

晉師伐秦

左氏傳九年秦景公使士稚乞師於楚將以伐晉楚
子許之秋楚子師於武城以為秦援秦人侵晉晉
饑弗能報也十年晉荀罃伐秦報其侵也

秋莒人伐我東鄙

左氏傳莒人間諸侯之有事也故伐我東鄙

公會晉侯宋公衛侯曹伯莒子邾

公作邾婁下小邾同

子齊世子

光滕子薛伯杞伯小邾子伐鄭

左氏傳諸侯伐鄭齊崔杼使太子光先至於師故長

於滕已酉師於牛首

呂氏曰齊世子光序諸侯上主會者為之也春秋不改所以示譏言上下之無禮文專以強弱事勢為先後也

冬盜殺鄭公子駢

公穀作斐

公子發公孫輒

左氏傳初子駢與尉止有爭將禦諸侯之師而黜其車子駢為田洹司氏堵氏侯氏子師氏皆喪田焉故五族聚羣不逞之人因公子之徒以作亂

杜氏注八

年子駟所殺公
子熙等之黨
於是子駟當國子國為司馬子耳

為司空子孔為司徒冬十月戊辰尉止司臣侯晉
堵女父子師僕帥賊以入晨攻執政於西宮之朝
殺子駟子國子耳子孔知之故不死

伊川先生解盜殺三卿不稱大夫失卿職也

泰山孫氏曰盜者微賤之稱盜一日而殺三卿故列
數之惡鄭伯失刑政

武夷胡氏傳卿大夫者國君之陪貳政之本也本強

則精神折衝聞有偃息談笑而却敵國之兵勝千里之難者矣乃至於身不能保而盜得殺之於朝安在其為陪貳乎故削其大夫為當官失職者鑒也

戍鄭虎牢

左氏傳諸侯之師城虎牢而戍之晉師城梧及制士魴魏絳戍之鄭及晉平

武夷胡氏傳虎牢之城地不繫鄭者責在鄭也戍而

繫鄭者罪諸侯也曷為責鄭設險所以守國有是險而不能設犧牲玉帛待盟境上使其民人不享土利辛苦墊隘無所底告然後請成故城不繫鄭者責其不能有也曷為罪諸侯夫鄭人從楚固云不義然中國所以城之者非欲斷荆楚之路為鄭蔽也駐師阨險以逼之爾至是伐而復戍焉猶前志也則可謂以義服之乎故戍而繫鄭者若曰鄭國分地受諸天子非列國所得專所以罪諸侯也

聖人既以虎牢還繫於鄭又書楚公子貞帥師救鄭諸侯之罪益明矣夫以救許楚所以深罪諸侯不能保鄭肆其陵逼曾荆楚之不若也亦可為深切著明也哉

楚公子貞帥師救鄭公至自伐鄭

左氏傳楚子囊救鄭十一月諸侯之師還鄭而南至於陽陵楚師不退知武子欲退曰今我逃楚楚必驕驕則可與戰矣欒黶曰逃楚晉之耻也我將獨

進師遂進己亥與楚師夾潁而軍子蟜曰諸侯既
有成行必不戰矣從之將退不從亦退退楚必圍
我猶將退也不如從楚亦以退之宵涉潁與楚人
盟轅廡欲伐鄭師荀瑩不可曰我實不能禦楚又
不能庇鄭鄭何罪不如致怨焉而還今伐其師楚
必救之戰而不克為諸侯笑丁未諸侯之師還侵
鄭北鄙而歸楚人亦還

襄陵許氏曰書楚救鄭而致公知諸侯之避楚也避

楚侵鄭不書諱也

十有一年春王正月作三軍

左氏傳季武子將作三軍告叔孫穆子曰請為三軍
各征其軍穆子曰政將及子子必不能武子固請
之穆子曰然則盟諸乃盟諸僖閔詛諸五父之衢
正月作三軍三分公室而各有其一三子各毀其

乘季氏使其乘之人以其役邑入者無征

杜氏注使軍乘

之人率其邑役入季氏者無公征

不入者倍征

杜氏注不入季氏者則使公家倍征

之說利病欲驅使入已

孟氏使半為臣若子若弟

杜氏注盡取子弟以

其父兄歸公

不然不舍

杜氏注制軍分民不如是則三家不舍其故而改作也

杜氏注增立中軍萬二千五百人為軍

武夷胡氏傳三軍魯之舊也古者大國三軍次國二

軍小國一軍魯侯封於曲阜地方數百里天下莫

強焉及僖公時能復周公之宇而史克作頌其詩

曰公車千乘說者以為大國之賦也又曰公徒三

萬說者以為大國之軍也故知三軍魯之舊耳然

車而謂之公車則臣下無私乘也徒而謂之公徒則臣下無私民也若有侵伐諸卿更帥以出事畢則將歸於朝車復於甸甲散於兵卒還於邑將皆公家之臣兵皆公家之衆不相係也文宣以來政在私門襄公幼弱季氏益張廢公室之三軍而三家各有其一季氏盡征焉而舊法亡矣是以謂之作其明年季孫宿救台遂入鄆又其後享范獻子而公臣不能具三耦民不屬公可知也春秋書其

作舍以見昭公失國定公無正而兵權不可去公室有天下國家者之所宜鑒也

呂氏曰三軍舊制也數不必常以示稱也今魯無事而用常制勞民費財不尚德而覲武亂所由作也夏四月四卜郊不從乃不郊

穀梁傳夏四月不時也四卜郊非禮也

鄭公孫舍之帥師侵宋

左氏傳鄭人患晉楚之故子展曰與宋為惡諸侯必

至吾從之盟楚師至吾又從之則晉怒甚矣晉能驟來楚將不能吾乃固與晉使疆場之司惡於宋宋向戌侵鄭大獲子展曰師而伐宋可矣夏鄭子展侵宋

公會晉侯宋公衛侯曹伯齊世子光莒子邾

公作邾婁下同子

滕子薛伯杞伯小邾子伐鄭

左氏傳四月諸侯伐鄭己亥齊太子光宋向戌先至於鄭門於東門其莫晉荀瑩至於西郊東侵舊許

衛孫林父侵其北鄙六月諸侯會於北林師於向
右還次於瑣圍鄭觀兵於南門西濟於濟隧鄭人
懼乃行成

秋七月己未同盟於亳

公穀作京城北

左氏傳秋七月同盟于亳范宣子曰不慎必失諸侯
諸侯道敝而無成能無貳乎乃盟載書曰凡我同
盟毋蘊年毋壅利毋保姦毋留惡救災患恤禍亂
同好惡獎王室或間茲命司慎司盟名山名川羣

神羣祀先王先公七姓十二國之祖明神殛之俾
失其民隊命亾氏陪其國家

伊川先生解鄭服而同盟也隨復從楚伐宋云同見
其反覆

杜氏注亳城鄭地

公至自伐鄭

穀梁傳不以會致盟後復伐鄭也

楚子鄭伯伐宋

左氏傳楚子囊乞旅於秦秦右大夫詹帥師從楚子

將以伐鄭鄭伯逆之丙子伐宋

公會晉侯宋公衛侯曹伯齊世子光莒子邾子滕子薛伯杞伯小邾子伐鄭會於蕭魚

左氏傳諸侯之師觀兵於鄭東門鄭人使王子伯駢行成甲戌晉趙武入盟鄭伯冬十月丁亥鄭子展出盟晉侯十二月戊寅會於蕭魚庚辰赦鄭囚皆禮而歸之納斥侯禁侵掠鄭人賂晉侯以師悝師觸師蠲廣車軌車淳十五乘甲兵備凡兵車百乘

歌鐘二肆及其鐃磬女樂二八晉侯以樂之半賜
魏絳曰子教寡人和諸戎狄以正諸華八年之中
九合諸侯如樂之和無所不諧請與子樂之辭曰
抑臣願君安其樂而思其終也書曰居安思危思
則有備有備無患敢以此規

伊川先生解諸侯數月之間再伐鄭鄭之反覆可知
鄭又服而請會不書鄭會謂其不可信也而晉悼
公推至誠以待人信之不疑至哉誠之能感人也

自此鄭不背晉者二十四年

杜氏注蕭魚鄭地

劉氏意林會于蕭魚鄭伯如會歟則宜以如會書乞
盟歟則宜以乞盟書今一皆沒之獨稱會何哉曰
春秋嘉善矜不能而成人之美悼公之服鄭也有
道其信義著於諸侯非一日之積此善之可嘉者
也鄭伯之欲從中國也亦非一日之積逼於楚之
強而未果此不能之可矜者也然則晉之取鄭鄭

之下晉不始於會蕭魚之日其信已在前矣至其
會也諸侯以小息中國以小安是乃有貴乎約信
者也其義不言而喻不盟而壹故畧其文以見其
實蓋春秋成人之美之意也故以戰伐為事者殘
人民敝財用未必能下敵也以盟誓為信者繁犧
牲費辭令未必能合衆也今示以救災恤禍亂
同好惡獎王室而遠人服矣為天下豈可以詐力
哉

蘇氏曰鄭與會也八年鄭人侵蔡獲蔡公子變自是
晉楚爭鄭五年之間晉人四以諸侯伐鄭楚輒救
之晉用知瑩之謀未嘗與楚人戰至是楚不能應
遂全師以服鄭於是鄭固與晉二十餘年楚不能
爭雖城濮之克不能過也

公至自會

穀梁傳伐而後會不以伐鄭致得鄭伯之辭也

伊川先生解兵不加鄭故書至自會

高郵孫氏曰春秋書至者或以前事或以後事蓋皆擇其重者伐鄭重於同盟則至以伐會而得鄭重於徒伐則至以會蓋皆其重也

楚人執鄭行人良霄

左氏傳九月諸侯悉師以復伐鄭鄭人使良霄太宰石彘如楚告將服於晉楚人執之

杜氏注良霄公孫輒子伯有也

陸氏纂例啖子曰凡稱行人而執以其事執也

言為使事

不稱行人而執以已執也

襄陵許氏曰書執良霄見楚力盡於是矣

冬秦人伐晉

左氏傳秦庶長鮑庶長武帥師伐晉以救鄭鮑先入
晉地士魴禦之少秦師而弗設備壬午武濟自輔
氏與鮑交伐晉師己丑秦晉戰於櫟晉師敗績易
秦故也

十有二年春王三月莒人伐我東鄙圍台

穀作郚
下同

杜氏注琅邪費縣南有台亭

泰山孫氏曰莒背蕭魚之會伐我東鄙圍台

季孫宿帥師救台遂入鄆

公作運

公羊傳大夫無遂事此其言遂何公不得為政爾

杜氏注鄆莒邑

泰山孫氏曰季孫宿受命救台不受命入鄆季孫宿

帥師救台遂入鄆專也

武夷胡氏傳鄆莒邑也遂者生事也入者逆詞也大

夫無遂事受命而救台不受命而入鄆惡季孫宿之專權使公不得有為於其國也或曰古者命將得專制閫外之事有可以安國家利社稷者專之可也曰此為境外言之也台在邦域之中而專行之非有無君之心者不敢為也昭公遂定無正夫豈一朝一夕之故哉其所由來者漸矣

夏晉侯使士魴

公作彭

來聘

左氏傳晉士魴來聘且拜師

襄陵許氏曰晉悼服鄭抑楚而聘魯善持勝矣詩曰
肆不殄厥愠亦不隕厥聞

秋九月吳子乘卒

左氏傳吳壽夢卒

襄陵許氏曰楚自共王以後不大為中國患者以壽
夢總兵而議其後

冬楚公子貞帥師侵宋

左氏傳冬楚子囊秦庶長無地伐宋師於楊梁以報

晉之取鄭也

公如晉

左氏傳公如晉朝且拜士魴之辱

十有三年春公至自晉

夏取邾

公作詩

左氏傳夏邾亂分為三師救邾遂取之

杜氏注邾小國也任城亢父縣有邾亭

劉氏傳邾者何附庸之國也

襄陵許氏曰晉始息民是以楚侵宋不報魯取邾不討取無大亂而已

秋七月庚辰楚子審卒

左氏傳秋楚共王卒

冬城防

左氏傳冬城防書事時也於是將早城臧武仲請俟畢農事

襄陵許氏曰鄭役既息魯政有裕則知取邾以為利

城防以為安而已矣

十有四年春王正月季孫宿叔老會晉士匄齊人宋人衛人鄭公孫蠆曹人莒人邾人滕人薛人杞人小邾人會吳于向

左氏傳十三年吳侵楚養由基奔命子庚以師繼之養叔曰吳乘我喪謂我不能師也必易我而不戒子為三覆以待我我請誘之子庚從之戰于庸浦大敗吳師十四年春吳告敗于晉會于向為吳謀

楚故也范宣子數吳之不德也以退吳人

陸氏纂例趙子曰魯書二卿志非度也

武夷胡氏傳使舉上客而叔老並書者以內卿行則
不得不書矣季孫宿以卿為介而不使之免叔老
介於宿而不敢避蓋兩失之雖晉人輕其幣而敬
其使於君命使人之體豈為得哉

二月乙未朔日有食之

夏四月叔孫豹會晉荀偃齊人宋人衛北宮括

公作鄭

公孫蠆曹人邾

公作邾
婁下同

人滕人薛人杞人小邾人伐秦

左氏傳夏諸侯之大夫從晉侯伐秦以報櫟之役也

晉侯待於竟使六卿帥諸侯之師以進及涇不濟

叔向見叔孫穆子穆子賦匏有苦葉叔向退而具

舟魯人邾人先濟鄭子蟈衛北宮懿子見諸侯之

師而勸之濟濟涇而次秦人毒涇上流師人多死

鄭司馬子蟈帥鄭師以進師皆從之至於櫟林不

獲成焉荀偃令曰雞鳴而駕塞井夷竈唯余馬首

是瞻樂廩曰晉國之命未是有也余馬首欲東乃
歸下軍從之伯游曰吾令實過悔之何及多遺秦
禽乃命大還晉人謂之遷延之役

己未衛侯

公衍字

出奔齊

左氏傳衛獻公戒孫文子甯惠子食皆服而朝日旰
不召而射鴻於囿二子從之不釋皮冠而與之言
二子怒孫文子如戚孫蒯入使公飲之酒使大師
歌巧言之卒章大師辭師曹請為之初公有嬖妾

使師曹誨之琴師曹鞭之公怒鞭師曹三百故師
曹欲歌之以怒孫子以報公公使歌之遂誦之蒯
懼告文子文子曰君忌我矣弗先必死并帑於戚
而入公使子蟜子伯子皮與孫子盟於丘宮孫子
皆殺之四月己未子展奔齊公如鄆使子行於孫
子孫子又殺之公出奔齊齊人以邾寄衛侯衛人
立公孫剽孫林父甯殖相之以聽命於諸侯

杜氏注諸侯之策書孫甯逐衛侯春秋以其自取奔

亡之禍故諸侯失國者皆不書逐君之賊也

劉氏意林奔而名者兩君之辭剽已立矣而衍不名何耶曰春秋雖亂世君不君臣不臣至於劫奪之禍尚皆有緣而作窮惡極亂猶不為也今剽以公族秉國政交於諸侯有日矣親逐其君而自取之惡有甚焉故絕其兩君之稱以見所惡也叔武攝位而鄭不名剽篡國而衍不名其不名也同而所以不名異叔武稱子而剽稱侯稱子者讓之意也

稱侯者篡之實也故曰貴賤不嫌同號美惡不嫌同辭為春秋者安可弗察也

武夷胡氏傳案左氏衛甯殖將死語其子曰吾得罪於君名在諸侯之策曰孫林父甯殖出其君夫所謂諸侯之策則列國之史也諸侯則若晉若魯是也史則若晉之乘魯之春秋是也今春秋書衛侯出奔齊而不曰孫林父甯殖出其君者蓋仲尼筆削不因舊史之文也欲知經之大義深考舊文筆

削之不同其得之矣或曰孫寔出君衆所同疾史策書之是也聖人曷為掩姦藏惡不暴其罪而以歸咎人主何哉曰臣而逐君其罪已明矣人君擅一國之名寵神之主而民之望也愛之如父母仰之如日月敬之如神明畏之如雷霆何可出也所為見逐無乃肆於民上縱其淫虐以棄天地之性乎故衛衍出奔使宗祝告且告無罪而定姜曰有罪若何告無春秋端本清源之書故不書所逐

之臣而以自奔為名所以警乎人君者為後世鑒
非聖人莫能修之謂此類也

莒人侵我東鄙

秋楚公子貞帥師伐楚

左氏傳秋楚子為庸浦之役故子囊帥于棠以伐吳
吳不出而還子囊殿以吳為不能而弗敵吳人自
臯舟之隘要而擊之楚人不能相救吳人敗之獲
楚公子宜穀

冬季孫宿會晉士匄宋華閱衛孫林父鄭公孫蒯莒人
邾人于戚

左氏傳晉侯問衛故於中行獻子對曰不如因而定
之衛有君矣冬會於戚謀定衛也

襄陵許氏曰衛人立剽非正也而謀定之則正弗勝
矣林父在會是以知其謀定剽也

十有五年春宋公使向戌來聘二月己亥及向戌盟于

劉

左氏傳宋向戌來聘且尋盟

杜氏注報二年豹之聘尋十一年亳之盟

劉夏逆王后于齊

左氏傳官師從單靖公逆王后於齊卿不行非禮也

杜氏注官師劉夏也天子官師非卿也天子不親昏使上卿逆而公監之

公羊傳劉夏者何天子之大夫也劉者何邑也

杜氏注劉采地夏名也

泰山孫氏曰劉魯地

高郵孫氏曰天子無親逆之禮逆后則使三公春秋

書逆王后者二祭公行得禮而又書之者譏遂事也劉夏之逆則以非三公而譏之也春秋二百四十二年周王十三其逆后者惟二是知非禮則書之也

武夷胡氏傳劉夏何以不稱使不與天子之使夏也婚姻人倫之本王后天下之母劉夏士也士而逆后是不重人倫之本而輕天下之母矣然則何使卿往逆公監之禮也官師從單靖公逆王后于齊

書劉夏而不書靖公是知卿往逆公監之禮也春秋婚姻得禮者常事不書

呂氏曰春秋之世天子諸侯皆無力於為善之意委靡不振亦任之而已爾劉夏士也而使逆后其違禮而無為善之意可知也

夏齊侯伐我北鄙圍成公救成至遇季孫宿叔孫豹帥師城成郭

左氏傳夏齊侯圍成貳於晉故也於是乎城成郭

公羊傳其言至遇何不敢進也

呂氏曰救成至遇不敢進也畏齊如此而無強自為善多進善人以立其國之意襄公之不才亦可知也又曰成郭壞而城之苟完而已當世君臣所以為國者如是而已寧有遠慮乎

常山劉氏曰武備不謹城邑見圍救患當速乃復畏避公之所為可知矣季孫宿叔孫豹帥師城成郭由不能救故成郭見壞而城也

秋八月丁巳日有食之

邾人伐我南鄙冬十有一月癸亥晉侯周卒

左氏傳秋邾人伐我南鄙使告於晉晉將為會以討

邾莒晉侯有疾乃止冬晉悼公卒遂不克會

襄陵許氏曰政在君則民一民一則國強政在臣則

民二民二則國弱魯自成襄失政大夫並竊國靈

齊與邾莒交伐其國不競甚矣則是無故民分於

三桓故也

十有六年春王正月葬晉悼公

三月公會晉侯宋公衛侯鄭伯曹伯莒子邾子薛伯杞伯小邾子于溴梁戊寅大夫盟

左氏傳春葬晉悼公平公即位改服修官烝於曲沃

杜氏注傳言晉將有
溴梁之會故速葬

警守而下會於溴梁命歸侵

田以我故執邾宣公莒犁比公且曰通齊楚之使
晉侯與諸侯宴於溫使諸大夫舞曰歌詩必類齊
高厚之詩不類荀偃怒且曰諸侯有異志矣使諸

大夫盟高厚高厚逃歸於是叔孫豹晉荀偃宋向
戌衛甯殖鄭公孫蠆小邾之大夫盟曰同討不庭
公羊傳諸侯皆在是其言大夫盟何信在大夫也何
言乎信在大夫徧刺天下之大夫也曷為徧刺天
下之大夫君若贅旒然

穀梁傳溴梁之會諸侯失正矣諸侯會而曰大夫盟
正在大夫也諸侯在而不曰諸侯之大夫大夫不
臣也

杜氏注葬晉悼公踰月而葬速也溴水名出河內軹縣東南至溫入河

泰山孫氏曰案三年公會單子晉侯宋公衛侯鄭伯莒子邾子齊世子光已未同盟于雞澤陳侯使袁僑如會戊寅叔孫豹及諸侯之大夫及陳袁僑盟言諸侯之大夫此直曰戊寅大夫盟不言諸侯之大夫者雞澤之會諸侯始失政也至于溴梁則又甚矣溴梁之會政在大夫也政在大夫故不言諸

侯之大夫不言諸侯之大夫者大夫無諸侯故也

溴梁晉地

高郵孫氏曰論語曰天下有道禮樂征伐自天子出天下無道禮樂征伐自諸侯出自諸侯出蓋十世希不失矣自大夫出五世希不失矣陪臣執國命三世希不失矣孔子之所謂十世則隱桓之時也所謂五世則宣成之時也春秋始隱桓天下之禮樂征伐出於諸侯而王道絕矣宣成以前諸侯之

大夫尚多稱人宣成以後魯宋齊晉蔡衛陳鄭八國之大夫會盟侵伐名氏悉書無復更稱人者於時六卿專晉三桓擅魯齊之政出於崔高衛之政歸於孫甯天下諸侯之國政無不在於大夫者孔子傷之始於隱桓而春秋作隱桓至於襄昭凡十世矣

蘇氏曰杜丘之會諸侯既次於匡書曰公孫敖帥師及諸侯之大夫救徐雞澤之會諸侯既盟而陳侯

使袁僑如會書曰叔孫豹及諸侯之大夫及陳袁
僑盟今諸侯既會將使大夫盟高厚高厚逃歸則
書曰豹及諸侯之大夫盟可矣獨書曰大夫盟何
也荀偃怒而使大夫盟高厚欲以強服諸侯則政
在大夫也自是晉政在六卿故獨書大夫盟言無
君也

武夷胡氏傳上二年春正月會於向十有四國之大
夫也夏四月會伐秦十有三國之大夫也冬會於

戚七國之大夫也此三會皆國之大事也而使大夫皆專之而諸侯皆不與焉是列國之君不自為政弗躬弗親禮樂征伐已自大夫出矣况悼公既沒晉平初立無先公之明也君若贅旒而大夫張亦宜矣豈一朝一夕之故哉善惡積於至微而不可揜常情忽於未兆而不預謀荀偃怒大夫盟而晉靖公廢趙籍韓虔魏斯為諸侯之勢見矣有國者謹於禮而不敢忽此春秋以待後世之意也

晉人執莒子邾子以歸

左氏傳以我故執邾宣公莒犁比公且曰通齊楚之使

劉氏意林晉人知莒子邾子之可以討矣而未知已之不可討也用亂治亂用不肖治不肖禍乃始作非正本之意也沈同問孟子燕可伐與孟子曰可沈同伐燕齊人以孟子為勸之也孟子曰可彼如曰孰可伐之則將曰為天吏則可以伐之譬猶殺

人者而問曰人可殺與亦將應之曰可彼如曰孰可殺之則將曰為士師者可殺之今以燕伐燕曷為勸之哉夫孟子可謂知本矣

泰山孫氏曰晉平溴梁之會方退執莒子邾子以歸又不歸於京師非所以宗諸侯也

高郵孫氏曰僖二十一年諸侯會楚執宋公經不再言楚人執之所以罪中國之諸侯從盟主以會楚子楚執其盟主而諸侯會於溴梁將以號令而安

之也會而執二國之君春秋罪之故曰晉人也楚
外裔晉中國于楚則不責于晉則責之有知與無
知者異也

齊侯伐我北鄙

夏公至自會

五月甲子地震

叔老會鄭伯晉荀偃衛甯殖宋人伐許

左氏傳許男請遷於晉諸侯遂遷許許大夫不可晉

人歸諸侯

杜氏注唯以其師討許之不肯遷

鄭子蟈聞將伐許遂

相鄭伯以從諸侯之師穆叔從公

杜氏注從公歸

齊子帥

師會晉荀偃夏六月次於楫林庚寅伐許次于函

氏

襄陵許氏曰晉卿主兵而先鄭伯者臣不可過君也

秋齊侯伐我北鄙圍成

左氏傳秋齊侯圍成孟孺子速傲之齊侯曰是好勇

去之以為之名速遂塞海陘而還

大雩

冬叔孫豹如晉

左氏傳冬穆叔如晉聘且言齊故晉人曰以寡君之
未禘祀與民之未息不然不敢忘穆叔曰以齊人
之朝夕釋憾於敝邑之地是以大請敝邑之急朝
不及夕引領西望曰庶幾乎比執事之間恐無及
也

十有七年春王二月庚午邾子貜公穀並

作閭卒

杜氏注宣公也

宋人伐陳

左氏傳春宋莊朝伐陳獲司徒邛卑宋也

夏衛石買帥師伐曹

左氏傳衛孫蒯田於曹隧飲馬於重丘毀其餅重丘人閉門而詢之曰親逐而君爾父為厲是之不憂而何以田為夏衛石買孫蒯伐曹取重丘曹人愬於晉

秋齊侯伐我北鄙圍桃

公作桃

高厚

公穀作齊高厚

帥師伐我北

鄙圍防

左氏傳齊人以其未得志於我故秋齊侯伐我北鄙

圍桃高厚圍臧紇於防師自陽關逆臧孫至於旅

松耶叔紇臧疇臧賈帥甲三百宵犯齊師送之而

復齊師去之

杜氏注桃魯地弁縣東南有桃虛

泰山孫氏曰案十五年齊侯伐我北鄙圍成十六年

齊侯伐我北鄙圍成此年齊侯伐我北鄙圍桃高
厚伐我北鄙圍防三年之中君臣加兵於魯者四
此齊之不道亦可知也

九月大雩

宋華臣出奔陳

左氏傳宋華閱卒華臣弱臯比之室使賊殺其宰華
吳宋公聞之曰臣也不唯其宗室是暴大亂宋國
之政必逐之左師曰臣也亦卿也大臣不順國之

恥也不如蓋之乃舍之十一月甲午國人逐瘳狗
瘳狗入於華臣氏國人從之華臣懼遂奔陳

冬邾人伐我南鄙

左氏傳冬邾人伐我南鄙為齊故也



春秋集解卷二十

欽定四庫全書

經部

呂氏春秋集解卷二十一

詳校官監察御史臣徐如澍

給事中臣溫常綬履勘

總校官原任中允臣王燕緒

校對官學正臣李巖

謄錄監生臣林紹龍

欽定四庫全書

春秋集解卷二十一

襄公

宋 呂本中 撰

十有八年春白狄來

左氏傳春白狄始來

公羊傳曰狄者何夷狄之君也何以不言朝不能朝也

劉氏意林諸侯間於天子之事則相朝相朝者考禮
正刑一德以尊王室為之也是以春秋亦予其朝
夫蕃服於中國無事焉其於天子世一見則諸侯
雖善其交際不得而通也是以春秋亦不予其朝
不予其朝者懲淫慝一内外也周公致太平越裳
氏重九譯而獻其白雉周公曰君子德不及焉不
享其贄此乃天子而讓也況列國之君守藩之臣
乎

夏晉人執衛行人石買

左氏傳晉人執衛行人石買於長子執孫蒯於純留
為曹故也

杜氏注石買即是伐曹者宜即懲治本罪而晉因其
為行人之使執之故書行人以罪晉

劉氏傳稱人以執者非伯討也此其為非伯討奈何
衛孫蒯淫獵於曹曹人閉門詢之孫蒯怒使石買
帥師以伐曹曹人訴諸晉石買以君命聘於晉晉

人執之晉能知石買之伐曹為惡矣而未能知孫
蒯之逐其君為惡也蒯者曷為者也孫林父之子
也是始惡於君而逐之

秋齊師穀作侯

伐我北鄙

襄陵許氏曰齊人四年之間五伐鄙而四圍邑又從
邾莒以助其虐諸侯之陵暴未有若是者也是以
動天下之兵幾亡其國

冬十月公會晉侯宋公衛侯鄭伯曹伯莒子邾子滕子

薛伯杞伯小邾子同圍齊

左氏傳秋晉侯伐齊冬十月會於魯濟尋溴梁之言
同伐齊齊侯禦諸平陰塹防門而守之廣里范宣
子告析文子曰吾知子敢匿情乎魯人莒人皆請
以車千乘自其鄉入既許之矣若入君必失國子
盍圖之子家以告公公恐齊侯登巫山以望晉師
晉人使司馬斥山澤之險雖所不至必旃而疏陳
之使乘車者左實右偽以旃先輿曳柴而從之齊

侯見之畏其衆也乃脫歸丙寅晦齊師夜遁十一
月丁卯朔入平陰遂從齊師晉人欲逐歸者魯衛
請攻險己卯荀偃士匄以中軍克京絃乙酉魏絳
欒盈以下軍克邾趙武韓起以上軍圍廬弗克十
二月戊戌及秦周伐雍門之款雍門齊城門己亥焚雍
門及西郭南郭劉難士弱率諸侯之師焚申池之
竹木壬寅焚東郭北郭齊侯駕將走郵棠太子與
郭榮叩馬曰師速而疾略也將退矣君何懼焉抽

劍斷鞅乃止甲辰東侵及濰南及沂

伊川先生解書同圍見諸侯之惡齊

劉氏傳會者聚辭也既曰會矣又曰同圍齊何同圍
之者猶曰環之也環之者何不通也諸侯之軍四
分或焚其郛或攻其門譬如棲之者然此蓋伐也
曷為不言伐圍不言伐也

泰山孫氏曰齊為不道數侵諸侯故諸侯同圍之言
同者諸侯同心疾齊也

武夷胡氏傳凡侵伐圍入未有書同者而獨於此書
同圍齊何也齊環背盟棄好陵虐神主肆其暴橫
數伐鄰國觀加兵於魯則可見矣諸侯所共惡疾
故同心而圍之也同心圍齊其以伐致何也見齊
環無道宜得惡疾大諸侯之伐而免其圍齊之罪
辭也春秋於此有沮橫逆抑強暴之意孟子曰國
必自伐而後人伐之自作孽不可逭其齊侯環之
謂矣尚誰懟哉

曹伯負芻卒于師

楚公子午帥師伐鄭

左氏傳鄭子孔欲去諸大夫將叛晉而起楚師以去
之使告子庚子庚弗許楚子聞之使楊豚尹宜告
子庚曰國人謂不穀主社稷而不出師死不從禮
不穀即位於今五年師徒不出人其以不穀為自
逸而忘先君之業矣子庚歎曰君王其謂午懷安
乎吾以利社稷也見使者稽首而對曰諸侯方睦

於晉臣請嘗之若可君而繼之不可收師而退可
以無害子庚帥師治兵於汾於是子驕伯有子張
從鄭伯伐齊子孔子展子西守二子知子孔之謀
完守入保子孔不敢會楚師楚師伐鄭次於魚陵
右師城上棘遂涉潁次於旃然薦子馮公子格率
銳師侵費滑胥靡獻於雍梁右回梅山侵鄭東北
至於蟲牢而返子庚門於純門信於城下而還涉
於魚齒之下甚雨及之楚師多凍役徒幾盡

十有九年春王正月諸侯盟于祝柯

公作阿

左氏傳春諸侯還自沂上盟於督揚曰大母侵小

督揚

即祝柯也

杜氏注前年圍齊之諸侯也祝柯縣今屬濟南郡

高郵孫氏曰諸侯已圍齊而為祝柯之盟不序諸侯

者前目後凡也

晉人執邾子

左氏傳執邾悼公以其伐我故

劉氏傳稱人以執者非伯討也此其為非伯討奈何
邾人伐魯晉人疾焉執其君以劫其地然則曷為
不言以歸舍之也曷為舍之未得其地故劫之已
得其地故舍之

公至自伐齊

劉氏傳此圍也其以伐致何圍而以伐致者以伐告
也

取邾田自漵水

左氏傳遂次於泗上疆我田取邾田自漵水歸之於我

杜氏注取邾田以漵水為界也漵水出東海合鄉縣西南經魯國至高平湖陸縣入泗

泰山孫氏曰諸侯土地受之天子不可取也言取惡內也自漵水者隨漵水為界也

蘇氏曰成二年晉人敗齊於鞏使齊人歸我汶陽之田書曰取汶陽田不言齊魯地也今以晉命取田

於邾故書曰取邾田自漵水言非魯地也

季孫宿如晉

左氏傳季武子如晉拜師

葬曹成公

夏衛孫林父帥師伐齊

左氏傳晉欒魋帥師從衛孫文子伐齊

杜氏注經書夏

秋七月辛卯齊侯環卒

公作環

左氏傳夏五月壬辰晦齊靈公卒

經書七月辛卯

晉士匄帥師侵齊至穀聞齊侯卒乃還

左氏傳晉士匄侵齊及穀聞喪而還禮也

公羊傳還者何善辭也何善爾大其不伐喪也

杜氏注詳錄所至及還者善得禮

陸氏纂例士匄聞齊侯卒乃還歸父還皆不當更往

又並合禮故曰還事畢也善辭也

還例見莊八年宣十八年

劉氏傳還者何善辭也何善爾古之為師也不伐喪

大夫以君命出境有可以安社稷利國家者則專

卷二十一
之可也穀者齊地也其曰至穀而後稱其義也非
齊地則勿復乎曰止師而請之君曰可而後止不
可則復之期可而後止臣之事君也凡在國無專
焉子之事親也凡在家無專焉臣子大節也

蘇氏曰將在軍君命有所不受有善而專之君與有
焉必君命而後可則安用將矣

常山劉氏曰天下無王諸侯擅命征伐各自己出利
人之難以成其私故伐人之喪者比比而是而士

勾乃有惻隱之心愍人之患還師不侵豈不善乎
武夷胡氏傳喪必不可伐非進退可疑而待請者

八月丙辰仲孫蔑卒

齊殺其大夫高厚

左氏傳齊侯娶於魯曰顏懿姬無子其姪驥聲姬生
先以為太子諸子仲子戎子戎子嬖仲子生牙屬
諸戎子戎子請以為太子許之仲子曰不可光之
立也列於諸侯矣公曰在我而已遂東太子光使

高厚傳牙以為太子夙沙衛為少傅齊侯疾崔杼
微逆光疾病而立之光殺戎子秋八月齊崔杼殺
高厚於灑藍而兼其室

劉氏傳稱國以殺大夫者罪累上也高厚之累上奈
何齊靈公廢太子光以牙為太子高厚傅之靈公
疾崔杼微逆光靈公卒光即位於是殺高厚也

鄭殺其大夫公子嘉

公作喜

左氏傳鄭子孔之為政也專國人患之乃討西宮之

難與純門之師子孔當罪以其甲及子革子良氏
之甲守甲辰子展子西率國人伐之殺子孔而分
其室

武夷胡氏傳不稱鄭人者嘉則有罪矣而子展子西
不能正以王法肆諸市朝與衆同棄乃利其室而
分之有私意焉故稱國以殺而不去其官此春秋
原情定罪之意

冬葬齊靈公

城西郭

左氏傳城西郭懼齊也

叔孫豹會晉士匄于柯

左氏傳齊及晉平盟於大隧故穆叔會范宣子于柯
杜氏注魏郡內黃縣東北有柯城

襄陵許氏曰宣十五年書仲孫蔑會齊高固于無婁
成五年書叔孫僑如會晉荀首于穀襄十九年書
叔孫豹會晉士匄于柯以見政在大夫列國之事

如此非正也故屢譏之

城武城

左氏傳穆叔歸曰齊猶未也不可以不懼乃城武城

杜氏注泰山南武城縣

二十年春王正月辛亥仲孫速

公作邀下同

會莒人盟于向

左氏傳春及莒平孟莊子會莒人盟于向督揚之盟故也

杜氏注向莒邑

夏六月庚申公會晉侯齊侯宋公衛侯鄭伯曹伯莒子邾子滕子薛伯杞伯小邾子盟于澶淵

左氏傳夏盟于澶淵齊成故也

杜氏注澶淵在頓丘縣南今名繁汙此衛地又近戚

田

秋公至自會

仲孫速

公作速

帥師伐邾

左氏傳邾人驟至以諸侯之事弗能報也秋孟莊子

伐邾以報之

泰山孫氏曰仲孫速背澶淵之盟伐邾

蔡殺其大夫公子燮

穀作濕

蔡公子履奔楚

左氏傳蔡公子燮欲以蔡之晉蔡人殺之公子履其母弟也故出奔楚初蔡文侯欲事晉曰先君與於踐土之盟晉不可棄且兄弟也畏楚不能行而卒楚人使蔡無常公子燮求從先君以利蔡不能而死

劉氏傳稱國以殺大夫者罪累上也公子燮之累上
奈何蔡莊侯欲受盟於晉未能行而卒公子燮請
從先君國人不欲於是殺公子燮請從先君何以
為有罪非其力也而任之非其民之欲也而強之
燮之智足以殺其身而已矣

武夷胡氏傳公子燮謀君之合於義者也國人乃不
順焉而殺燮此何罪矣故稱國以殺而不去其官
公子履其母弟也進不能正國退不能遠害懼禍

而奔從於南蠻書者罪之也

陳侯之弟黃

公穀作光

出奔楚

左氏傳陳慶虎慶寅畏公子黃之逼愬諸楚曰與蔡司馬同謀楚人以為討公子黃出奔楚

穀梁傳諸侯之尊弟兄不得以屬通其弟云者親之也親而奔之惡也

陸氏纂例稱弟者罪其兄也非兄之罪則曰公子

叔老如齊

左氏傳齊子初聘於齊禮也

冬十月丙辰朔日有食之

季孫宿如宋

左氏傳冬季武子如宋報向戌之聘也

二十有一年春王正月公如晉

左氏傳公如晉拜師及取邾田也

謝十八年伐齊之師潞水之田

邾庶其以漆閭丘來奔

左氏傳邾庶其以漆閭丘來奔季武子以公姑姊妻

之皆有賜於其從者於是魯多盜季孫謂臧武仲
曰子盍詰盜武仲曰不可詰也紇又不能季孫曰
我有四封而詰其盜何故不可子為司寇將盜是
務去若之何不能武仲曰子召外盜而大禮焉何
以止吾盜紇也聞之在上位者洒濯其心一以待
人軌度其信可明徵也而後可以治人夫上之所
為民之歸也上所不為而民或為之是以加刑罰
焉而莫敢不懲若上之所為而民亦為之乃其所

也又可禁乎庶其非卿也以地來雖賤必書重地也

穀梁傳以者不以者也來奔者不言出舉其接我者也

杜氏注二邑在高平南平陽縣東北有漆鄉西北有顯閭亭

陸氏纂例以地來奔即叛也

陸氏微旨不言叛為內諱也受叛臣非也故諱以示

譏也

武夷胡氏傳庶其邾大夫也春秋小國之大夫不書其姓氏微也其以事接我則書其姓氏謹之也莒慶以大夫即魯而圖婚接我不以禮者也邾庶其以地叛其君而來奔接我不以義者也以欲敗禮則身必危以利棄義則國必亂春秋禮義之大宗故小國之大夫接我以利欲則特書其姓氏謹之也漆一邑閭丘一邑而不言及者庶其之私邑所

受於君而食之者也此叛臣何以不書叛書名書地而竊邑叛君之罪見矣夫棄夷狄從諸夏其慕義之心疑可與也然有據城以求援者君子猶以為不可受而況鄰國乎書來奔而魯受叛臣納其地之罪亦見矣

襄陵許氏曰書以邑奔邑叛自襄始大夫盛強故也

夏公至自晉

秋晉欒盈出奔楚

左氏傳欒桓子娶於范宣子生懷子范鞅以其亡也
怨欒氏桓子卒欒祁與其老州賓通幾亡室矣懷
子患之祁懼其討也愬諸宣子曰盈將為亂范鞅
為之徵懷子好施士多歸之宣子畏其多士也信
之懷子為下卿宣子使城著而遂逐之秋欒盈出
奔楚

劉氏意林不以范勾逐之為文而以盈之自出為說
使盈無可逐之釁則勾不得逐矣勾之罪易見盈

之失難知此春秋所以深探其情而大正其本也
道莫難於治天下而天下之治在國國之治在家
家之治在身身不治國家不可得治也詩之首周
召書之首堯舜皆從此生矣春秋述堯舜者也是
以謹於人道之始閨門之內易曰閑有家悔亡家
之不閑悔不亦宜乎

九月庚戌朔日有食之冬十月庚辰朔日有食之

襄陵許氏曰日比年食又比月食蓋自是八年之間

而日七食禍變重矣

曹伯來朝

左氏傳冬曹武公來朝始見也

公會晉侯齊侯宋公衛侯鄭伯曹伯莒子邾公作邾婁子于

商任

左氏傳會于商任錮欒氏也

杜氏注商任地闕

蘇氏曰錮欒氏非禮也古者大夫去國君使人導之

出疆又先於其所往

襄陵許氏曰欒氏之出非其罪也徒以權臣私相忌
惡何有於國而平公受其蔽怒勤動諸侯以逞范
鞅之積憾必欲使盈無所容於世故盈發憤卒興
禍亂此皆以私敗公足為古今至戒是時中國無
事晉無所發政而亟會諸侯則知徒以欒氏傳不
誣也

二十有二年春王正月公至自會

夏四月

秋七月辛酉叔老卒

杜氏注子叔齊子

冬公會晉侯齊侯宋公衛侯鄭伯曹伯莒子邾子

公穀有滕

子薛伯杞伯小邾子于沙隨

左氏傳秋欒盈自楚適齊晏平仲言於齊侯曰商任

之會受命於晉今納欒氏將安用之弗聽冬會于

沙隨復錮欒氏也欒盈猶在齊晏子曰禍將作矣

齊將伐晉不可以不懼

武夷胡氏傳會子商任錮欒氏也會于沙隨復錮欒氏也古者大夫去國君不埽其社稷不係累其子弟不收其田邑使人導之出疆又先之於其所往救五典厚人倫也今晉不念欒氏世勲而逐盈又將搏執之而命諸侯無得納焉則亦過也楚逐申公巫臣子反請以重幣錮之楚子曰止彼若能利國家雖重幣晉將可乎若無益於晉晉將棄之何

勞錮焉其賢於商任沙隨之謀遠矣

公至自會

楚殺其大夫公子追舒

左氏傳楚觀起有寵於令尹子南未益祿而有馬數

十乘王遂殺子南於朝轅觀起於四境

蘇氏曰追舒為令尹寵觀起未益祿而有馬數十乘

楚人患之故誅追舒罪不至死故稱國以殺

二十有三年春王二月癸酉朔日有食之

三月乙巳杞伯匄卒

左氏傳春杞孝公卒

夏邾卑

公作鼻穀作卑

我來奔

杜氏注卑我是庶其之黨

泰山孫氏曰此言邾卑我來奔者惡內也惡鄉受邾

叛人邑今又納邾叛人也

葬杞孝公

陳殺其大夫慶虎及慶寅陳侯之弟黃

公穀作光

自楚歸于

陳

左氏傳陳侯如楚公子黃慤二慶於楚楚人召之使
慶樂往殺之慶氏以陳叛夏屈建從陳侯圍陳陳
人城板隊而殺人役人相命各殺其長遂殺慶虎
慶寅楚人納公子黃

穀梁傳陳殺其大夫慶虎及慶寅稱國以殺罪累上
也及慶寅慶寅累也

劉氏傳稱國以殺其大夫者罪累上也慶虎之累上

奈何慶虎為無道暴蔑其君而去其親慶虎之為人臣也足以殺其身矣然而暴虐其君而去其親三年國幾亡者陳侯則實使之也其言及慶寅何以罪及之也寅慶虎之族也

武夷胡氏傳人君擅一國之利勢使權臣暴蔑其身而不能遠欲去其親而不能保譖愬之於大國而不能辨至因夷狄之力然後能克則非君人之道也故二慶之死稱國以殺公子黃之出特以弟書

者譏歸陳侯也凡此皆春秋端本之意

呂氏曰慶虎慶寅之罪不等故言及

晉欒盈復入于晉入于曲沃

左氏傳晉將嫁女於吳齊侯使析歸父媵之以藩載
欒盈及其士納諸曲沃欒盈夜見胥午而告之伏
之而觴曲沃人樂作午言曰今日得欒孺子何如
對曰得主而為之死猶不死也皆歎有泣者爵行
又言皆曰得主何貳之有盈出徧拜之四月欒盈

帥曲沃之甲因魏獻子以晝入絳樂王鮒侍坐於
范宣子或告曰欒氏至矣宣子懼桓子曰奉君以
走固宮必無害也欒氏所得其唯魏氏乎而可強
取也宣子奉公以如固宮范鞅逆魏舒則成列旣
乘將逆欒氏矣趨進曰欒氏帥賊以入鞅之父與
二三子在君所矣遂超乘驅之宣子逆諸階賂之
以曲沃欒氏乘公門宣子謂鞅曰矢及君屋死之
鞅用劒以帥卒欒盈奔曲沃晉人圍之

劉氏傳曷為不言叛不言叛者非叛者也其非叛奈何劫衆以敵君則亂而已矣

蘇氏曰不書自齊何也齊之納盈非以兵明納之也辟如盜賊私納之耳故不書自齊

武夷胡氏傳欒氏晉室之世臣故盈雖出奔猶繫於晉復入者甚逆之辭為其既絕而復入也曲沃者所食之地當是時權寵之臣各以利誘其下使為之用至於殺身而不避莫知有君臣之分者也故

聞語樂孺子者則或泣或歎以為得主而為之死
猶不死也盈從之遂入絳乘公門若非天棄欒氏
又有范鞅之謀晉亦殆矣原其失在於錮之甚急
使無所容於天地之間是以此極春秋備書之
以見人而不仁疾之已甚亂也其為後世鑒豈不
深切著明也哉

秋齊侯伐衛遂伐晉

左氏傳齊侯伐衛自衛將遂伐晉崔杼諫弗聽陳文

子見崔武子曰將如君何武子曰吾言於君君弗聽也以為盟主而利其難羣臣若急君於何有齊侯遂伐晉取朝歌為二隊入孟門登太行張武軍於熒庭戍郛邵封少水以報平陰之役乃還趙勝帥東陽之師以追之獲晏釐

八月叔孫豹帥師救晉次于雍榆

公穀作渝

穀梁傳言救後次非救也

杜氏注雍榆晉地汲郡朝歌縣東有雍城

陸氏微旨淳聞於師曰凡言救者救急之名不當次止也僖元年次于聶北救邢本次止而遙為邢援故先書次後言救譏其失救急之義也今此君命往救晉豹畏齊而次故上言救晉以明出師本意是先通君命也言君本命往救而豹自次止所以不譏君而罪豹也

高郵孫氏曰不救則懼晉之討往救則畏齊之強大夫帥師救之而次焉聶北之次先次後救可救而

不救則罪重也雍榆之次先救後次欲救而力不能
有罪而猶輕耳春秋之義次皆有罪於次之中
有足矜者雍榆之次是也

已卯仲孫速

公作速

卒

冬十月乙亥臧孫紇出奔邾

左氏傳季武子無適子公彌長而愛悼子欲立之臧
紇為立之季氏以公鉏為馬正孟孫惡臧孫季孫
愛之孟氏之御騶豐點好羯也曰從余言必為孟

孫孟莊子疾豐點謂公鉏苟立羯請讎臧氏公鉏
謂季孫曰孺子秩固其所也若羯立則季氏信有
力於臧氏矣弗應已卯孟孫卒公鉏奉羯立於戶
側季孫曰孺子長公鉏曰何長之有唯其才也遂
立羯秩奔邾臧孫入哭甚哀多涕曰季孫之愛我
疾疾也孟孫之惡我藥石也夫石猶生我疾之美
其毒滋多孟孫死吾亡無日矣孟氏閉門告於季
孫曰臧氏將為亂不使我葬季孫不信臧孫聞之

戒冬十月孟氏將辟藉除於臧氏臧孫使正夫助
之除於東門甲從已而視之孟氏又告季孫季孫
怒命攻臧氏乙亥臧紇斬鹿門之闕以出奔邾

晉人殺欒盈

左氏傳晉人克欒盈於曲沃盡殺欒氏之族黨

公羊傳曷為不言殺其大夫非其大夫也

穀梁傳惡之弗有也

不言殺其大夫是不有之以為大夫

泰山孫氏曰不言其大夫者欒盈出奔楚當絕也稱

人以殺從討賊辭

齊侯襲莒

左氏傳齊侯還自晉不入遂襲莒門于且于傷股而

退莒子獲杞梁莒人行成

勝大國益懼故行成

陸氏纂例趙子曰掩其不備者曰襲

高郵孫氏曰以強攻弱又掩其不備焉書曰齊侯襲莒蓋侵伐之中而罪之尤者也

二十有四年春叔孫豹如晉

仲孫羯帥師侵齊

左氏傳孟孝伯侵齊晉故也

夏楚子伐吳

左氏傳夏楚子為舟師以伐吳不為軍政無功而還

秋七月甲子朔日有食之既

襄陵許氏曰春秋三書食既桓三年以周桓敗宣八
年以楚莊興至是而中國諸侯皆受盟於楚矣

齊崔杼帥師伐莒

左氏傳秋齊侯聞將有晉師使陳無宇從蘧啓疆如
楚辭且乞師崔杼帥師送之遂伐莒侵介根

大水

八月癸巳朔日有食之

公會晉侯宋公衛侯鄭伯曹伯莒子邾子滕子薛伯杞

伯小邾子于夷

公作陳儀

左氏傳會于夷儀將以伐齊水不克

冬楚子蔡侯陳侯許男伐鄭

左氏傳冬楚子伐鄭以救齊門於東門次於棘澤諸侯還救鄭楚子自棘澤還使蘧啓疆帥師送陳無字

公至自會

陳鍼宜咎出奔楚

左氏傳陳人復討慶氏之黨鍼宜咎出奔楚

襄陵許氏曰鍼宜咎之事無聞焉爾而以慶氏黨逐則其人亦可知已易曰比之匪人不亦傷乎

叔孫豹如京師

左氏傳齊人城邾穆叔如周聘且賀城

襄陵許氏曰自宣九年仲孫蔑如京師其後五十餘年乃始有叔孫豹以罕書也蓋自是不書聘王矣

大饑

穀梁傳五穀不升為大饑一穀不升謂之嗛二穀不升謂之饑三穀不升謂之饑四穀不升謂之康五穀不升謂之大侵大侵之禮君食不兼味臺榭不

塗弛侯廷道不除

范氏注廢侯不燕射廷內道路不修除

百官布而

不制

范氏注官職修列不可關廢不更有造作

鬼神禱而不祀此大侵

之禮也

武夷胡氏傳古有救災之政若國凶荒或發廩以賑
乏或移粟以通用或徙民以就食或為粥溢以救
餓莩或興工作以聚失業之人緩刑舍禁弛力薄
征索鬼神除盜賊弛射侯而不燕置廷道而不修
殺禮物而不備雖有旱乾水溢民無菜色所以備

之者如此其至是年秋有陰沴之災而冬大饑蓋所以賑業之者有不備矣故書之以為戒

二十有五年春齊崔杼帥師伐我北鄙

左氏傳齊崔杼帥師伐我北鄙以報孝伯之師也公患之使告於晉孟公綽曰崔子將有大志不在病我必速歸何患焉其來也不寇使民不嚴異於他日

夏五月乙亥齊崔杼弑其君光

左氏傳齊棠公之妻東郭偃之姊也東郭偃臣崔武子棠公死偃御武子以弔焉見棠姜而美之遂取之莊公通焉驟如崔氏以崔子之冠賜人崔子因是又以其間伐晉也欲弑公以說於晉而不獲間公鞭侍人賈舉而又近之乃為崔子間公夏五月崔子稱疾不視事乙亥公問崔子遂從姜氏姜入於室與崔子自側戶出甲興公踰牆又射之中股反隊遂弑之賈舉州綽邴師公孫敖封具鐸父襄

伊儻堙皆死祝佗父祭於高唐至復命不說弁而
死於崔氏申蒯侍漁者退謂其宰曰爾以帑免我
將死其宰曰免是反子之義也與之皆死晏子立
於崔氏之門外其人曰死乎曰君人者豈以陵民
社稷是主臣君者豈為其口實社稷是養故君為
社稷死則死之為社稷亡則亡之若為已死而為
已亡非其私暱誰敢任之門啓而入枕尸股而哭
之興三踊而出盧蒲癸奔晉王何奔莒叔孫宣伯

之在齊也叔孫還納其女於靈公嬖生景公丁丑
崔杼立而相之慶封為左相大史書曰崔杼弑其
君崔子殺之其弟嗣書而死者二人其弟又書乃
舍之南史氏聞大史盡死執簡以往聞既書矣乃
還

武夷胡氏傳齊莊公見弑賈舉州綽等十人皆死之
而不得以死節稱何也所謂死節者以義事君責
難陳善有所從違而不苟者是也雖在屬車後乘

必不肯同入崔氏之宮矣若此十人者獨以勇力
聞皆逢君之惡從於昏亂而莊公嬖之者死非其
所比諸匹夫匹婦自經於溝瀆而莫之知者猶不
逮也晏平仲曰君民者豈以陵民社稷是主臣君
者豈為其口實社稷是養故君為社稷死則死之
為社稷亡則亡之若為已死而為已亡非其私暱
誰敢任之此十人者真其私暱任之宜矣雖殺身
不償責安得以死節許之哉

公會晉侯宋公衛侯鄭伯曹伯莒子邾子滕子薛伯杞

伯小邾子于夷

公作陳
下同儀

左氏傳晉侯濟自泮會于夷儀伐齊以報朝歌之役
齊人以莊公說賂晉侯以宗器樂器自六正五吏
三十帥三軍之大夫百官之正長師旅及處守者
皆有賂晉侯許之

泰山孫氏曰晉再合諸侯將伐齊齊人懼弑莊公以
求成晉侯許之八月己巳諸侯同盟於重丘是也

莊公復背澶淵之盟加兵晉衛信不道矣然齊人
弑莊公以求成逆之大者晉侯不能即而討之以
定齊國之亂曷以宗諸侯宜乎大夫日熾自是卒
不可制也故先書崔杼之弑以著其惡

武夷胡氏傳諸侯會于夷儀將以討齊齊使隰鉏請
成慶封如師男女以班賂晉侯以宗器樂器自六
正五吏三十帥三軍之大夫百官之正長師旅及
處守者皆有賂晉侯許之夫晉本為報朝歌之役

來討及會夷儀既聞崔杼之弑則宜下令三軍建而復旆聲於齊人問莊公之故執崔杼以戮之謀於齊衆置君以定其國示天討之義則方伯連帥之職修矣今乃知賊不討而受其賂則是與之同情也故春秋治之如下文所貶云

六月壬子鄭公孫舍之帥師入陳

左氏傳初陳侯會楚子伐鄭當陳隧者井堙木刊鄭人怨之六月鄭子展子產帥車七百乘伐陳宵突

陳城遂入之陳侯扶其大子偃師奔墓子展命師
無入公宮與子產親御諸門陳侯使司馬桓子賂
以宗器陳侯免擁社子展執繫而見子美入數俘
而出司徒致民司馬致節司空致地乃還

泰山孫氏曰前年楚子蔡侯陳侯許男伐鄭故鄭公
孫舍之帥師入陳

秋八月己巳諸侯同盟于重丘

左氏傳同盟于重丘齊成故也趙文子為政令薄諸

侯之幣而重其禮穆叔見之謂穆叔曰自今以往
兵其少弭矣齊崔慶新得政將求善於諸侯武也
知楚令尹若敬行其禮道之以文辭以靖諸侯兵
可以弭

伊川先生解諸侯同病楚也

杜氏注重丘齊地

武夷胡氏傳崔杼既弑其君矣晉侯受其賂而許之
成故盟于重丘特書曰同

公至自會

衛侯入于夷儀

左氏傳晉侯使魏舒宛沒逆衛侯將使衛與之夷儀

衛獻公入于夷儀

杜氏注夷儀本邢地衛滅邢而為衛邑晉愍衛衍失

國使衛分之

武夷胡氏傳鄭伯突入於櫟衛侯入于夷儀其入則
一或名或不名者鄭伯奪正以立而國人君之諸

侯助之不知其義不可以有國也故特書其名著
王法以絕之衛侯蔑其冢卿失國出奔固不為無
罪矣然有世叔儀以守有母弟鱣以出或撫其內
或營其外有歸道焉則其義猶未絕也故止書其
爵而不名及甯喜弑剽復歸於衛然後書名此聖
人俟其改過遷善不輕絕人之意曾子曰夫子之
道忠恕而已矣此類是也

呂氏曰二十五年夏五月公會晉侯宋公衛侯鄭伯

曹伯莒子邾子滕子薛伯杞伯小邾子于夷儀此
衛侯即剽也衛侯入于夷儀即衎也不嫌兩君名
實相亂乎曰衎雖無道然非臣下所當逐則剽亦
非臣下所得立故衎入夷儀也不名以正其名於
其復歸則正其失地之罪名之然則鄭伯突入于
櫟何以名曰突不當立者衎當立者衎當立者故
入于夷儀不名也

楚屈建帥師滅舒鳩

左氏傳二十四年吳人為楚舟師之役故召舒鳩人
舒鳩人叛楚楚子師於荒浦舒鳩子請受盟二十
五年秋舒鳩人卒叛楚令尹子木伐之及離城吳
人救之吳師大敗遂圍舒鳩舒鳩潰八月楚滅舒
鳩

冬鄭公孫夏

公作囓

帥師伐陳

左氏傳冬十月子西復伐陳陳及鄭平

十有二月吳子遏

公穀作謁

伐楚門于巢卒

左氏傳十二月吳子諸樊伐楚以報舟師之役門于巢巢牛臣曰吳王勇而輕若啓之將親門我獲射之必殪是君也死疆其少安從之吳子門焉牛臣隱於短垣射之卒

穀梁傳古者大國過小邑小邑必飾城而請罪禮也吳子謁伐楚至巢入其門門人射吳子有矢創反舍而卒古者雖有文事必有武備非巢之不飾城而請罪非吳子之自輕也

杜氏注過諸樊也

劉氏傳古者入境必假道過門必為之釋甲入國則
不馳古者死而不弔者三畏厭溺死而不義者皆
畏之類也

春秋集解卷二十一